

L'imperadôr Berengari e il cjastic dai Ongjars

La vite burascjose di Berengari, marchês dal Friûl, re de Italie e imperadôr, e coincît cuntun dai moments plui intrigôs e neris de storie furlane e, in cualchi misure la riflet. La sô trate in fats e je diferenciade da un scjavalcjâsi di vicendis ledrosis, des cuâl nol è facil lâ daûr a un fîl condutôr logjic. Berengari al nas a Cividât ator dal 850. So pari, Everart, marchês dal Friûl, al fo un zentilom ric di virtûts e di benemerencis, celebrât dal poete Dedulio Scoto e fintremai venerât come sant in cualchi regjon de France; sô mari Glîse, principesse, e jere fie di Luduì il Piu e sût di Carli il Grues: e fo juste apont cheste illustri parintât che e vierzè la strade aes ambizions di Berengari. Everart al vignì in Friûl viers il 840, a pene maridât al ve, prime di Berengari, un altri fi, Unroc, che i sucedè inte incarghe di marchês cuant che al murì tal 865. Dut câs tal 875 a Unroc i jere za sucedût tal marchesât il fradi Berengari, che al comparive tra i sostenidôrs di Luduì il Gjermanic inte sucession dal re Luduì II, e al lozave a Cividât la fie dal defont, Irmingarde. De incoronazion (881) ae deposizion (887) di so barbe Carli il Grues, Berengari al cirì di sostignîlu, lant in rotis par chest cun Guido di Spolêt. Cuant che al vignì butât jù il disgraciât imperadôr, il marchês Berengari come dissident dai Carolingjis e cu la poie dai vescui de Italie Disore, al ve la corone dal ream italic. Lui in fats al anticipà la politiche dai Otons tal favorî i princips ecclesiastics cuintri i laics; ma chescj ultins, e so redut i marchês di Ivree, di Toscane e di Spolêt, lu contrastarin cence padin e no i permeterin di infuartî il so podê oltri i confins de marcje furlane. Inmò Guido di Spolêt, vincintlu sul flum Trebbia (888), lu mandà fûr ancje de Lombardie e, a sô volte, si fasè incoronâ re de Italie a Pavie e po (891) imperadôr di Rome. Di chê altre bande, ancje Arnolf di Gjermanie al rivendicave i dirits di sucession su la Italie Disore, che e jere stade di so pari Carliman: ma cun Arnolf Berengari al cjatà la fate di metisi dacuardi. Cundut achel, daspò cualchi an, al fo obleât a scjampâ di là des monts, mentri Arnolf al cuistave il setri de Italie e la corone imperiâl (895). Ma par pôc; l'an daspò une malatie grivie e meteve de bande il gnûf imperadôr e Berengari al podeve dispartîsi la Italie cun Lambert, fi di Guido di Spolêt. Muart, daspò dome trê agns, ancje Lambert, il ream al restave cence altris impediments dut intes mans Berengari (898). Al sarès stât, chest, un moment favorevul par lui par infuartî e organizâ un guvier unitari de penisule, se l'an daspò no fos rivade jù in Friûl, e po inte planure padane la prime, dispietade invasion dai Ongjars, che lui nol fo bon di contrastâ. Di chest insucès a cjaparin la dade i marchês di Toscane e Camerino par invidâ in Italie Luduì di Provence, al cuâl il pape al de la corone di imperadôr. Berengari dut câs, de Bavarie dulà che al jere lâ a parâsi, i de aduès a Verone, lu metè in pereson e daspò vêlu inceât, lu tornà a mandâ in France (905). Cheste vitorie e fasè incesi cetant la sô innoime e e segnà l'inizi di une dade di fortune par lui. Cul jutori dai vescui (ancje il Patriarcje di Aquilee, Fidri, al ve di lui largjis donazions) si metè a ordenâ il ream e, daspò dîs agns, al otignì dal pape Zuan X la corone imperiâl (915). Ma al jere destin che Berengari nol podès jessi a lunc re o imperadôr. Tal 920 une conzure di feudataris e fo inmaneade par invidâ Ridolf di Borgogne cuintri Berengari: lui ju fasè sorprendi su lis monts parsore Bergum da bandis di

Ongjars, che a jerin tornât jù a fiscâ. Ridolf par altri al rivà chenti istès, sostignût dal marchês de Toscane, e si fasè proclamâ ancje lui re de Italie. L'imperadôr, contornât di feudataris malfidants o ribei, al scugnì une altre volte rindisi a cirî il sostegn dai Ongjars. Batût daprûf Pavie di Ridolf, ostegjât dai sudits che i Ongjars a dispueavin di ogni avè e a folpeavin, Berengari al fo obleât a lâ a sierâsi a Verone, dulà che al vignì sassinât tal 924 dal so vassal Flambert.

Il so compartament inciert e dopli e lis sôs aleancis cui Ongjars, intai ultins agns, a forin cetant di dam pe marcje furlane, che e vignì viscade cence remission, dispopolade e cuvierte di ruvinis. Nol è pussibil stabilî cetantis voltis che chescj vuerîrs dispietâts a vebi invadût il Friûl: oltri ae prime devastazion dal 889, si cjatin testimoniancîs de lôr presince inte nestre Regjon intai agns 904, 905, 906, 921, 923, 924, 932, 942, 944, 947, 952. Ae fin dome la sgrimie dal imperadôr Oton I di Sassonie, daspò la mitât di chest secul disgraciât, e rivà a contrastâju e a batiju. Al è probabil che intes lôr traviersadis dal Friûl, no sedin mai rivâts intes zonis dai cuei e des monts e che lis robariis e i macilis si sedin discjadenâts so redut in planure, e in maniere particolâr su che fasse centrâl che si clamà po daspò "Vastata Ungarorum", dilunc la Stradalte. Ce che al è par altri sigûr al è che il Friûl in mieç secul al pierdè ogni fuarce, ogni forme di vite e ogni lûs di benstâ materiâl e culturâl. La sôs lente ricostruzion e la sôs storie di daspò a restin colegadis in maniere strete cul cjapâ forme e fuarce dal principât temporâl dal Patriarcjât di Aquilee.

(Josef Marchet – da "Friuli uomini e tempi" - test ridusût e voltât par furlan par cure de redazion di Ladins dal Friûl – Lui 2014)